



From
the People of Japan

Komunikadu Imprensa

Serimónia Entrega Sintina Remodeladu no Suplementasaun Nutrisional ba Eskola iha Lautem

Dili, 3 Setembru 2024 – Iha loron 3 fulan Setembru, hala'o ona serimónia entrega ba sintina sira ne'ebé hadi'a ona no suplementasaun nutrisional nian iha EBF Vairoque iha Munisípiu Lautem. Serimónia ne'e hetan partisipasaun husi Sr. KIMURA Testuya, Embaixador Japaun nian iha Timor-Leste no Sra. Patrizia DiGiovanni, Representante País UNICEF nian iha Timor-Leste, nune'e mós representante sira husi Ministériu Edukasaun autoridade lokál, profesóres, estudantes, no inan-aman husi EBF Vairoque.

Desde 2022, Governu Japaun, ho UNICEF hanesan ajénsia implementasaun, implementa ona Projetu ba Hadi'a Nutrisaun Labarik nian. Projetu ne'e fornese suplementu nutrisional ba labarik, inan isin-rua no inan sira, no inklui formasun atu haforsa kapasidade pesoál servisu saúde nian. Ida-ne'e foka ba promosaun prátika nutrisaun ne'ebé di'ak liu ba labarik sira (husi *foetus* to'o fulan 24), adolexente no inan sira; trata labarik sira ne'ebé sofre malnutrisaun aguda; hametin sistema nasional no rede komunitária sira; no ajuda hatun nivel aas malnutrisaun nian entre labarik sira ho idade menus husi tinan lima.

Hanesan parte ida husi projetu ne'e, bloku sintina lima ne'ebé hadi'a ona, inklui sintina ida ne'ebé asesivel ba ema ho defisiensia, no suplementasaun ásidu fóliku ferru nian entrega ona ba EBF Vairoque. Ida-ne'e sei fó benefísiu ba estudante na'in 139 no profesór na'in 6.

Durante serimónia ne'e, Embaixador Kimura afirma “*Japaun rekoñese katak hadi'a ijiene eskola no nutrisaun ba labarik nu'udar dezafiu urjente ida iha Timor-Leste. Importante tebes katak labarik sira ne'ebé sei lidera futuru bele tuir eskola no dezenvolve tantu fíziku no mentál liuhosi estudu no halimar. Ha'u kontente atu kontribui hodi kria ambiente ida ne'ebé estudante sira iha Eskola EBF Vairoque bele foka ba sira-nia estudu liuhosi hadi'a sintina sira no fornese suplementu nutrisional sira.*”

Tinan ida ne'e marka tinan 25 kooperasaun Japaun nian ho Timor-Leste. Japaun sei kontinua apoia kampu desenvolvimentu oin-oin iha Timor-Leste, inklui setór edukasaun.

###REMATA###

Ba informasaun klean liu tan bele kontaktu:

Embaixada Japaun iha Timor-Leste iha +670 3323131 | 2

Ajénsia Koperasaun Internasionál Japaun (JICA) Timor-Leste iha +670 7317 3486 | 3312420